

Inatsimmut, Kalaallit Nunaanni eqqartuussisaatsimut inatsisip (pinerluttulerinermi il.il. meeqqat inuusuttullu videokkut apersorneqartarnerat) allannguutissaatut siunnersuummut Namminersorlutik Oqartussat oqaaseqaatissaannut Inatsisartut aalajangiiffigisassaattut siunnersuut (Pinngortitamut, Avatangiisinut Inatsisinillu Atuutsitsinermut Naalakkersuisoq)

Saqqummiussissut

(Pinngortitamut, Avatangiisinut Inatsisinillu Atuutsitsinermut Naalakkersuisoq)

Siullermeerneqarnera

Annertuumik nuannaarutigalugu Naalakkersuisut sinnerlugit aalajangiiffigisassatut siunnersuut manna saqqummiutissavara. Siunnersuut pinerluttulerinermut suliani meeqqat inuusuttullu video atorlugu apersorneqartarnerannut tunngasuvoq aammalu Kalaallit Nunaannut eqqartuussisarnermut inatsimmi allannguuteqartitsinermik malitseqarani. Inatsisissatut siunnersuummi siunertaavoq meeqqat inuusuttullu ilungersunartumik pinerluttuliornermi eqqugaasimasutut imaluunniit isiginnittuusimasutut ilimagineqartut illersorneqartarnerisa pitsaanerulersinneqarnissaat. Assersuutigalugu tassaasinnaapput kinguaassiuutitigut pinerluttuliornerit, qanigivallaakkamik atoqateqarnerit aamma ilaqtariinni persuttaanerit. Inatsisissatut siunnersuummi ukiut killissaliussat 12-inik ukiulinniit 15-inik ukiulinnut qaffanneqarput. Pisuni immikkuullarissuni inuusuttut 18-it inorlugit ukiullit aamma video atorlugu apersorneqarsinnaassapput. Taamaaliornikkut meeqqat amerlanerusut siunissami aaqqissuussami pineqartunut ilaatinneqalissapput.

Meeqqat pinerluttuliornerit ilungersunartunit nalaanneqaraangata, tamanna meeqqamut misigisaminik eqqartuussivimmi inunnik takornartanik ulikkaartumi oqaluttuarsinnaanissamut sakkortuujusinnaavoq. Taamaattumik video atorlugu nassuiaateqarsinnaanissaq, taamaalillunilu eqqartuussivimmi apersorneqarnissamik pinngitsuuinissaq, meeqqanut oqinnerusussaavoq. Video atorlugu apersuineq eqqartuussinerup nalaani uppernarsaatitut takutinneqassaaq.

Apersuinermi nalinginnaasumi unnerluussisoq aamma illersuisoq uppernarsaasumik apersuinissamut periarfissaqartarput. Unnerluussisup aamma illersuisup apeqquteqarsinnaanissamut periarfissaqarnissaa, inatsisitigut isumannaallisaanerup qulakkeernissaanut qitiusumik tunngaviuvoq. Video atorlugu apersuinermit atuinermit inatsisitigut isumannaallisaanerup atorunnaarsinneqannginnissaa qulakkeerniarlugu, pasisaasup illersuisua video atorlugu apersuinermit, inimit sanianiittumit, malinnaanissamut periarfissaqarpoq. Taamaaliornikkut meeraq aammalu pasineqartoq tamarmik eqqarsaatigineqassapput.

Namminersorneq pillugu inatsit malillugu danskit naalakkersuisuisa inatsisissanut siunnersuutit Kalaallit Nunaannut tunngassuteqartut, Folketing-imut saqqummiunneqannginneranni Namminersorlutik Oqartussanut oqaaseqarfigineqartussanngorlugit nassiuttartussaavaat. Aalajangiiffigisassatut siunnersuut manna oqaaseqaateqarnissamut taamaattumut tunngassuteqarpoq.

Video atorlugu apersuisarnek pillugu maleruagassat 2014-imi upernaakkut ataatsimiinnermi Inatsisartunit sammineqarput. Suliarinninnerup nalaani Inatsisinit Ataatsimiititaliaq aamma Inatsisartuni ilaasortat ukiunut killissaliussanut akerliliissuteqarput. Tassami taanna 12-inik ukiulinnut killilerneqarmat. Akerliliissuteqarnerit taakkua video atorlugu apersuisarnek pillugu maleruagassat Naalagaaffeqatigiinneq tamakkerlugu maannakkut allanngortinneqalernerannut pisooqataapput.

Eqqartuussisarneq pillugu inatsimmi allannguuteqartitsineq, meeqqat inuusuttullu pinerluttuliornermi ilungersunartumi nalaanneqarsimasut imaluunniit takunnittuusimasut, pitsaaneruseqarpoq, pitsaaneruseqarpoq illersorneqartalernerannik kinguneqassaaq, taamaattumik immikkoortoq Naalakkersuisuni annertuumik pingaartinneqarpoq.

Taamatut oqaaseqarlutik Naalakkersuisut immikkoortoq Inatsisartuni suliarineqartussanngorlugu tunniuppaat.